

Orijinne è evoluchòn dou – ou di – dahhú

Origine et évolution du – ou des – dahut(s)

Texte original: Manuel RIOND

Transcription en ORB : Manuel MEUNE

Ce texte de Manuel Riond est écrit en francoprovençal d'Allières (Gruyère, Fribourg, Suisse). Il est rédigé dans une GRAPHIE PHONETIQUE inspirée de la "GRAPHIE COMMUNE VALAISANNE", dont la caractéristique principale est que dans un mot, l'accent tonique tombe toujours sur la dernière voyelle portant un accent typographique (aigu, grave, circonflexe).

[Voir : www.wikivalais.ch/index.php/Graphie_commune_pour_les_patois_valaisans.]

Le texte original (ici à gauche) est paru en 2016 dans le Bulletin du Centre d'études francoprovençales René Willien [n° 74]. Cette création humoristique fait écho à un article de Marcel Jacquat paru dans ce même bulletin en 2012 [n° 66], dans un esprit similaire – celui d'une recherche scientifique facétieuse –, et à d'autres articles figurant dans la bibliographie en fin de document. Le texte est paru accompagné d'une traduction en français, également réalisée par Manuel Riond, et avec quelques notes, supprimées dans la présente version, mais présentes dans le texte bilingue grüerien/français.

L'original est ici accompagné d'un texte en GRAPHIE SUPRADIALECTALE (DITE 'ORB'). Il ne s'agit pas d'une traduction, mais d'une transcription – réalisée par Manuel Meune. Elle ne permet pas de connaître l'exacte prononciation requise, mais, plus proche de l'orthographe du français, elle peut donner accès plus rapidement au sens des mots à quiconque n'est pas habitué à la graphie phonétique utilisée. Que Manuel Riond soit chaleureusement remercié d'avoir accepté que le texte en ORB figure en regard de l'original, malgré certaines réserves qu'il éprouve à l'égard de cette graphie !

Lè dahhú chon prou chûre di bih'e drôlète. Lou ègjiçhtanh'è l'è-j-ouva atèchtâye pæ di tèkçhto vîyo de mé d'on chyéklo, pæ di dèchkripchòn tradichenâle de ly a pã gran tèn, è pæ di rãro fochílo ènkonpyè.

Ma kòtje karaktèrichtíke k'on bàye chyã i dahhú dzúyon rèn tan bèn ènh'ènbyo (pær ègjènpyo la prèjèn'h'he ou na pã de kouârne, la grantyá rèlatíva di tâpye), kan bèn di-j-ôtre chàyon le pye chovèn de tôte lè dèchkripchòn dou dzoà d'òra (peh'ou bachè a grantè, ròba brâna ou gri-bron, châbre d'amòn chu lè hôtyá ke chon a l'orijinne de cha morfologí fro delé èkchèpchyonâle avouí chè tâpye de grantyá difèrènte). Ma ly-a-h'è óunna ou dutrè chouârte de dahhú ?

L'ètúde di fochílo lyètâye i tèmonyádzo dou dzoà d'òra mòh're ke ly èn-d-a dou típo ke chon rèn tan paræ : on dahhú chènbye-h'è motú è on dahú ènkornâ.

Les dahuts sont por sûr des bétyes drôlètes. Lor ègzistence l'est yua atèstâye per des tèxtos vielyos de més d'un sièclo, per des dèscripcions tradicionâles de l'y at pas grand-temps, et per des rôros fossilos encomplèts.

Mas quârques caractèristiques qu'on balye siâ ux dahuts jouyont ren tant ben ensemblo (per ègzemplo la presence ou nan pas de côrnes, la grantior relativa des tôples), quand ben des ôtres salyont le ples sovent de totes les dèscripcions du jorn d'ora (pletout bâsses a grantes, roba brona ou gris-bron, sobre d'amont sur les hôtiors que sont a l'origine de sa morfologie fôr delé èxcèpcionâle avouéc ses tôples de grantior difèrènte). Mas l'y at-to una ou doux-très sôrtes de dahut ?

L'ètúde des fossilos gll'yètâye ux tèmognâjos du jorn d'ora montre que l'y en at doux tipos que sont ren tant parièrs : un dahut semble-to motu et un dahut encornâ.

Che bàya che le dahhú ìre aparèntâ avouí le *Dahuterium agilis*. Adòn, mimamèn che chi vretâbyo krokodilyèn dou Triyâss moyèn dou pyató dè Daüss (èn Ardèche) mòh're ouinna pechënta dichimètriye èntre chè pi a kàtro dæ è chè pitíte man dèvà n a h'èn dæ, l'a rèn dè lèn dirèkto dè parèntâ avouí lè mamiféro ke chon lè dahhú.

Po èprovâ dè mi chèrnâ d'apri tyè tirâvan noutron mamiféro rèn tan chënpyo a rèvoûdre a lou pyâh'e, no fô dèvà n to no-j-apoyí chu lè tèmonyâdzo ke no pouârton rèn tyè lè fochílo dè l'èchpéche chèn kouârne.

Ma d'a premi, i djèn dè préchijâ ke le "dahhú motú" fâ ènpartyâ dou jânro **Darrutus**. Hha dènominachòn, lyètâye a hha dou darhú dè Borgònye ou dou darou di Vôje, l'è la premiè ke chi-je-j-ouva atèchtâye: adòn l'è la cholèta po hha bìh'e-ènke ke vayíche i-j-yè dè la hyènh'e. Ou dzoâ d'òra, ly-a rèn tyè ounn-èchpéche dè dahhú motú, le *Darrutus inaequipes*, chèn ke vou dre "le dahu i tâpye dè grantyâ inègâle", po dre.

Se bayê si le dahut ère aparentâ avouéc le Dahutherium agilis. Adonc, mémament se cél veretâblo crocodilien du Triâs moyen du platô de Daiüs (en Ardèche) montre una pouessienta dissimètrie entre ses pieds a quatre dègts et ses petites mans devant a cinq dègts, l'at ren de lim dirècto de parentâ avouéc les mamifèros que sont les dahuts.

Por èprovar de mielx cèrnar d'après què terâvant noutrons mamifèros ren tant simplo a revoudre a lor place, nos fôt devant tot nos apoyer sur les tèmognâjos que nos portont ren que les fossilos de l'èspèce sen côrnes.

*Mas d'a premièr, il gent de précisar que le "dahut motu" fât empartia du genro **Darrutus**. Cela dènomination, gllètâye a ceta du darhu de Borgogne, ou du darou des Vosges, l'est la première que seye uya atèstâye: adonc l'est la solèta por cela bètey-inque que valyèsse ux uelys de la science. U jorn d'òra, l'y at ren que un' èspèce de dahut motu, le Darrutus inaequipes, cen que vôt dère "le dahu ux tòples de grantior inègâle", por dère.*




Fig. 1 - Silouèta è chklèto d'on fochílo dou jânro *Darrutus*, chèn l'è a dre dou dahhú motú. La fôrma dou daräè dou krâno l'è pâ konyâ a dè bon.

*Fig. 1 - Silouèta et squelette d'un fossilo du genro *Darrutus*, cen l'est a dère lou dahut motu. La fôrma du derrièr du crâno l'est pas cognua a de bon.*

D'achuvën lè-j-atèchtachon dou mo "dahu" dèn lè-j-annâye 1920, la rèpartichòn jografika dè hha bìh'a ch'èh'endäe dèvàn to di-j-Ardènne i-j-Àlpe dou kutsën è ou Machí Chantrô, chu di kòtse dè rëliyäëvo, po dre.

Toparäe, no fô prou no moujâ ke hhou kòtse èh'àn tré pyàn ne ou tèn yô lè premí dahhú l'an yu le dzoà, ou Myochéno dou mitèn (chédze virgúla trè tànty'a dyi virgúla katro miyòn dè-j-an dèvàn no.).

Lè pye víyo fochílo dè dahhú, ke fan a vääre on bokenè d'achimètrí dè la grantyá èntre lè mènbro gòtso è dræ, chon a dè bon dè chi tèn, ly a tyëndze miyòn dè-j-an, kan lè-j-Àlpe l'an kemënhýí a ch'abadâ : i ch'abàye dè kòtye-j-ou to cholè dou tâcho (pi) atribuâ a *Darrutus (Palaeodarrutus) antiquus*, le premí ryére-père gran konyú dou dahhú, àche víyo tyè lè pye-j-anhyàn èlèfantidâ (lè-j-ayú di mamóuto) d'Urâjí.

No fô atèndre le Myochéno chupèryeú (dyi virgúla kàtro tànty'a h'ën miyòn dè-j-an) è l'abadâye di frîh'e dou Dzurà po vääre a tsèvanhyí la rèpartichòn jografika di dahhú. Po chi tèn, ke l'a yu ch'akràëh're lè pèchènte kútse dè lyàche arktíka, ly a rèn tyè le Dzurà è lè-j-a-premí di-j-Àlpe ke l'an bayí di fochílo, èn pîh'e, dè *Darrutus paraequipes* ("le dahhú i pyôte kâjú grànte paräere"), víyo dè vouè tànty'a chi miyòn dè-j-an ènveròn.

On væ achurâ vouéro lè mènbro gòtso è dræ chon pâ dè la mîma grantyá, tànty'a 'nna yîte dè tyëndze a vèn po sà. On pou obchèrvâ di fòrme dèchtrodyîre ("ke víron a dräete", pæ la mô ke lè pyôte dräete chon min grànte tyè lè gòtse) è lævodyîre ("ke víron a gòtse") èpúh'e on bokenè dè fòrme chimètríke.

D'assiuvent les atèstacions du mot "dahut" dens les anâyes 1920, la rèparticion geografique de cela bétye s'ètendèt devant tot des Ardènes ux Alpes du cuchient et u Massif Centrâl, sur des coches de reliêfo, por dére.

Tot-pariér, nos fôt prod nos musar que celos coches érant très planes u temps yô les premiérs dahuts l'ant vuy le jor, u Miocène du méten (sèze virgula très tant qu'a diéx virgula quatre milyons des ans devant nos).

Les ples vielyos fossilos de dahut, que fant a vère un boconèt d'assimètrie de la grantior entre les membros gòchos et drêts, sont a de bon de cél temps, l'y at quinze milyons des ans, quand les Alpes l'ant comencié a s'abadar : il s'abalye de quâr-ques ôs tot solêts du târso (pied) atribuâs a Darrutus (Palaeodarrutus) antiquus, le premiér riére-père-grant cognu du dahut, asse vielyo que les ples ancians èlèfantidâs (les aviòls des mamôtos) d'Eurasie.

Nos fôt atèndre le Miocèno supèrior (diéx virgula quatre tant qu'a cinq milyons des ans) et l'abadâye des frètes du Jura por vère a chevanciér la rèparticion geografica des dahus. Por cél temps, que l'a vuy s'acrète les pouessientes cuches de gllace arctica, l'y at ren que le Jura et les a-premiérs des Alpes que l'ant balyé des fossilos, en piéces, de Darrutus paraequipes ("le dahut ux piôtes quâsi grantes pariéres"), vielyos de huét tant qu'a siéx milyons des ans enveron.

On vêt assurâ gouéro les membros gòchos et drêts sont pas de la méma grantior, tant qu'a na gite de quinze a vengt por cent. On pô observar des fòrmes dèstrogires ("que veront a drâte", per l'amôr que les piâtes drètes sont muens grantes que les gòches) et lèvogires ("que veront a gòche") et pués un boconèt de fòrmes simètriques.

L'an djæmé trovâ bâ pær d'avô di fochîlo dè dahhú dèn lè kútse vîye dè châte tànty'a h'ën miyòn dè-j-an. Hha dichparichòn l'è prou chûre lyètâye avu l'aparichòn di premîre bîh'e dè la famiye dou lâ (jànro *Canis*). Ma dèn chtî tèn, óunna novàla l'èchpêche, *Darrutus intermedius* (le "dahhú èntèrmèdyäëro"), l'a ravuchäë a ch'achoh'â dèn di kòtse dè pití mon. Chtàche mòh're óunna mojaíka dè karak-téro arkaíko è modèrno.

Tsàtye níye di grëye è di punyè prèn óunna fôrma achimétríka, ma ke l'è la mîma dè la pâ gôtse è dräeta. On pou prou dre adòn ke lè fôrme dèchtrodyîre dè *Darrutus intermedius* l'an pratekamèn kàtre pi gôtso (èn mîmo tèn ke chon vinyäete pye pitíte, lè pyôte dräete chè chon tsó pou modifiyâye, tan bèn ke lou pi dræ l'an fournäë pæ rêchënbyâ a di pi gôtso) achebèn ke lè fôrme lævodyîre l'an kajú kàtre pi dræ.

La difèrènh'e dè grantyá èntèrmí lè pyôte gôtse è dräete vèn proutse, èn moyènna, dè vènt'è hèn po sà. Le Pyéichtochéno (dou virgúla h'ènkànte è vouäë miyòn dè-j-an tànty'a òndze mîle cha h'ën-j-an dèvan no), ke korèchpòn ou tèn di yèchí, l'a yu aparäeh're lè lâ, lè tsavô, lè-j-uròko è pu l'èchpêche dè dahhú dou dzoà d'òra, le *Darrutus inaequipes*. On pou rèn mé dichtèngâ la fôrma di-j-ou korèchpondèn d'on pi gôtso è d'on pi dræ.

Toparäë, lè gran-j-ou di mènbro gôtso è dræ (ke chon chobrâ l'èmâdze èn meryâ lè-j-on di-j-ôtro) chon gayâ difèrèn èn grantyá, la difèrènh'e pou adyèndre du trènta tàntyè a trènt' è hèn po sà, avouí óunna mònchtra varyabilitâ. Fô dre achebèn ke la fôrma dè la churfâh'e di níye di grëye è di punyè l'è difèrènte d'óunna pâ a l'ôtra.

L'ant jamés trovâ bâs per d'avâl des fossilos de dahut dens les couches vielyes de sèpt tant qu'a cinq milyons des ans. Cela disparicion l'est por sûr gllètâye avouéc l'aparicion des premiéres bétyes de la famelye du lop (genro Canis). Mas dens ceti temps, una novèla l-èspèce, Darrutus intermedius (le "dahut èntèrmèdiëro"), l'a revussië a s'assotar dens des coches de petits monts. Ceta-ce montre una mosayica de caractèros arcayicos et modèrnos.

Châque nilye des grelyes et des pouegnèts prend una fôrma asimétríca, mas que l'est la méma de la pârt gôche et drêta. On pôd prod dére adonc que les fôrmes dèstrogires de Darrutus intermedius l'ont practica-ment quatre pieds gôches (en mémo temps que sont vègnètes ples petites, les piôtes drêtes sè sont châ pou modifiyâyes, tant ben que lors pieds drêts l'ant fourné per ressembler a des pieds gôches) asse-ben que les fôrmes lèvogires l'ant quâsi quatre pieds drêts.

La difèrence de grantior entre-mié les piôtes gôches et drêtes vint prôche, en moyèna, de vengt-et-cinq por cent. Le Plè-yistocèno (doux virgula cinquante et huét milyons des ans tant qu'a onze mîle sèpt cents ans devant nos), que corrèspònd u temps des gllaciérs, l'at vuy aparêtre les lops, les chevâls, les ôrocos et pués l'èspèce de dahut du jorñ d'òra, le Darrutus inaequipes. On pôd ren més distingâr la fôrma des ôs corrèspòndants d'un pied gôcho et d'un pied drêt.

Tot-pariër, les grants ôs des membros gôchos et drêts (que sont sobrâs l'émâge en merior les uns des ôtros) sont galyârd difè-rents en grantior, la difèrence pôd adyèndre dès trenta tant qu'a trente et cinq por cent, avouéc una monstra varyabilitâ. Fôt dére asse-ben que la fôrma de la surface des nilyes des grelyes et des pouegnèts l'est difèrènte d'una pârt a l'ôtra.

Ly a rên dè fochílo achurâ dè dahhú dou tèn d'aprí lè yèchí (aprí nou míle cha h'ên-j-an dèvan J.-K.). Ma, ch'on vuítýe chèn ke n-èn-d-è di-j-ôtro jànro dè mamiféro, on pou chyâ chè moujá ke la morfologí dè *Darrutus inaequipes* ("le dahhú i tãpye dè grantýá inègãle") l'è-j-ouva achityà outre lè dou dèràë miyòn dè-j-an. Rèn tyè lè tèmonyãdzo ichtoríko púyon no bayí ounn'idé, pye ou mèn vãga, dè la morfologí dè hha bîh'e.

Èn-n-èfè, kemèn lè-j-èndràë dè lé-hô pær d'amòn chon rên tan favorãbyo po ke lè fochílo chè vouèrdíchan fenadrãë, pã le mèndro l'ou di daríre falãndze (chtache dè l'onlýòn) n'è konyú tank'óra, chèn ke no grãve dè chavãë che *Darrutus* l'avãë di-j-arpýòn ou di bôte.

Dè mîmo, l'an trovã rên tyè kòtye bokòn dè 'nna pokrítse d'on dzoúno dè *Darrutus paraequipes* ("le dahhú i pyôte kãjú grãnte parãère"), letýèn n'a, pæ dèfini-chòn, pã dè kouãrne : adòn, no-j-è ènpochúbyo dè dère che le dahhú l'a ou na di kouãrno kan l'è mã.

Toparãë, no chan ke l'artikulachòn dé la chèkònda vèrtèbra, ou axis, íre fro delé budzèrída è bayíve a kondjí a *Darrutus paraequipes* dè verí la tíh'a dè gayã sãn vouètãnta dègrã dè tsãtye pã. Chòche vèn dè chèn ke le dahhú l'a fôta dè povãë alã a la rèkulèta kan l'è aprí tsemenã dou lon dè la vèchãëra dè grãnte fríh'e tòte drãëte.

Lè fochílo mòh'ron ke la proporchòn di dahhú lævodyíro è dèchtrodyíro ("ke víron a drãëte", rèchpèktivamèn "ke víron a gòtse") l'è chobrãye la mîma du ly a vouãë miyòn dè-j-an tank'óra. Chèn bãye a vãère ke chtãche chon pã dou-j-èchpèche difèrènte, ma on-n-ènhènbyo dè bîh'e èntèrfèkònde.

L'y at ren de fossilo assurâ de dahut du temps d'après les gllacièrs (après nôf mile sèpt cents ans devant J.-C.). Mas, s'on gouétye cen que n-en est des ôtros genros de mamifèros, on pôt sia sè musar que la morfologie de Darrutus inaequipes ("le dahu ux tôples de grantior inègãle") l'est yuva assiètiê outre les doux derrièrs milyons des ans. Ren que les tèmognãjos historiques pôvyon nos balyér un' idê, ples ou muens vaga, de la morfologie de cela bétye.

En èfèt, coment les endrèts de lé-hôt per d'amont sont ren tan favorãblos por que les fossilos sè gouardéssant fin-adrèts, pas le muendro l-ôs des dèrrières falanjès (cetas-ce de l'onllon) n'est cognu tant qu'óra, cen que nos grãve de savèr se Darrutus l'avèt des arpions ou des botes.

De mémo, l'ant trovã ren que quãrques bocons de na pocritse d'un jueno de Darrutus paraequipes ("le dahut ux piôtes quãsi grantes parières"), lequint n'at, per dèfinicion, pas de còrnes : adonc, nos est empossiblo de dère se le dahu l'at ou nan des còrnes quand l'est môr.

Tot-pariér, nos sans que l'articulacion de la seconda vèrtèbra, ou axis, ére fôr delé bugièrída et balyéve a congíe a Darrutus paraequipes de veriér la téta de galyãrd cent huétanta degrãs de chãque pãrt. Ço-ce vint de cen que le dahu l'at fôta de povèr alar a la reculèta quand l'est après cheme-nar du long de la vèrsèra des grantes frètes totes drètes.

Les fossilos montrent que la proporcion de dahuts lèvogyros et dèstogyros ("que veront a drète", rèspèktivamèn "que veront a gòche") l'est sobrãye la méma dès l'y at huét milyons des ans tant qu'óra. Cen balye a vère que cetas-ce sont pas doves èspèces difèrèntes, mas un ensemblo de bêtyes èntèrfècondes.

Lè læ dè la jènètíka fan k'on krijèmèn (ke chè pãche pã chyã èn pratëka) èntre di bìh'e læëvo- è dèchtrodyïre vou bayí 'nna premîre jénérachòn dè dahhú avouí di pyôte a pou pri grãnte parãère, ma du la chèkònda jènérachòn chè rètrãvon tòte lè varyãnte pochúbye èntremí lè-j-èchtrémo ke chon tré lævodyïro è tré dèchtrodyïro.

Kòtye-j-óteú kemèn Ferrara è Klein klãchon le dahhú dèn le chou-j-ouãdre di Caniformia, chèn ke vou a dre ke le raprouïtsan dè la moh'ãëla byãntse è dou tachòn. Toparãë, kemèn lè fochílo dè *Darrutus* trovã chon gayã rá, è ke chon prou èbrekã èn dèpye, chutò lèj-ou dou krãno, chèn no grãve dè povãë rèyí chèn ke n-èn-d-è. On pou pã mímo bayí a hha bìh'e óunna pyãh'e chèrtãënna dèn yon ou l'òtr' ouãdre dè mamiféro konyú.

Pou-t-íh're mimamèn ch'abãde-h'e dè la cholèta l'èchpèche d'òra d'on ouãdre onkò pã dèfiní dè mamiféro arkaíko k'ègjichte po chè du ly-a oumènte vèn miyòn dè-j-an. Lè tèmonyãdzo ichtoríko chon nè prou prèchí nè dètèrmenèn. Rèn tyè la dèkrovãye è l'étúda hyèntífíka d'on chpèchimèn dou dzouà dè vouè dè *Darrutus inaequipes* no bayèrí l'èpãhyo dè rèjolvã lè-j-ènígme ke, tank'òra, chàbron lyètãye a chta bìh'e ke l'a di karaktèrichtíke fro delé èkchèpchyon-nãle.

Po chèn ke n-èn-d-è dou "dahhú a kouãrne" èvokã dèn la premîre ènpartyã dè chi tèkchto, l'è achurã óunna tott-òtra bìh'e ke partãdze avouí *Darrutus inaequipes* rènt tyè d'avãë lè tãpye pye kourte d'óunna pã tyè dé l'òtra. L'è por-a-dèbón le pye konyú di dahhú, notamèn dèchú l'Èntèrnètt, è l'è chitã dèjo le non **Dahutus** dèn la litèratúra hyèntífíka, pu *dahuts* dèn on manuch-krí dou XIV^o chyéklo.

Les lès de la gènètíca fant qu'un crouesement (que sè passe pas siã en pratica) entre des bétyes lèvo- et dèstrogires vôt balyér na premiére gènéracion de dahuts avouéc des piôtes a pou prés grantes parières, mas dès la seconda gènéracion sè retrovont totes les vareyentes possibles entre-mié les èxtrémos que sont très lèvo-giros et très dèstrogiros.

Quãrques òtors coment Ferrara et Klein cllãssont le dahut dens le sot-s-òrdre des Caniformia, cen que vôt a dére que le rapprochant de la motèla blanche et du tasson. Tot-pariér, coment les fossilos de Darrutus trovãs sont galyãrd rãrs, et que sont prod èbrecãs en de-ples, surtot les òs du crãno, cen nos grãve dè povèr triyér cen que n-en est. On pôtt pas mémo balyér a cela bétye une place certèna dens yon ou l'òtr' òrdre des mamifèros cognu.

*Pôt-ètré mémament s'abalye-to de la solèta l-èspèce d'òra d'un òrdre oncor pas dèfeni de mamifèros arcaýicos qu'ègziste por sè dès l'y at u muenta vengt milyons des ans. Les tèmognãjos historiques sont ni prod prècis ni dètèrmenants. Ren que la dècruvãye et l'étúda científica d'un spècimène du jorn de hué de *Darrutus inaequipes* nos balyerèt l'èspãço de rèsolvar les ènigmes que, tant qu'òra, sobront gllètãyes a ceta bétye que l'at des caractèristiques fôr delé èxèpcionèles.*

*Por cen que n-en est du "dahut a côrnes" èvocê dens la premiére empartia de cél tèxto, l'est assurã une tot òtra bétye que partage avouéc *Darrutus inaequipes* ren que d'avèr les tãples ples côrtes d'una pãrt que de l'òtra. L'est por-a-de-bon le ples cognu des dahuts, notamment dessus l'Entèrnèt, et l'est citã desot le nom **Dahutus** dens la litèratura científica, pués dahuts dens un manuscrit du XVI^e sièclo.*

D'achuvèn di film è di fotò pubyâ dèchu di chító dou ouébo, ch'abayè d'ounna choârta èchpéchyâla dè Kaprinnâ (la chou-famiye di tchîvre, mutón è tsâmo). Dou læviro dè vulgarijachòn è mé d'on tèmonyâdzo dou dzoà d'òra van dèn la mîma dirèkchòn. Èh'ennamèn, la difèrènh'e dè grantyá dè tâpye èntyè le jànro *Dahutus* l'è paräere a chèn ke chè væ dèn le fôrme rèchènte dè *Darrutus*, chèn ke rèprèjènte on ka ègjènpyéro dè konvèrdzènh'e èvolutiva.

A dère veré, hhou groupo dè mamiféro chon pâ dirèktamèn aparèntâ, toparäe lou annatomiye l'a dzuyí dè la mîma fah'on dèn on ènverounnamèn montanyâre prou paräe. L'è gayâ le mîmo l'aféro avouí lè-j-ójí è lè ratolûve ke l'an dèvelopâ di-j-âle èndèpendamèn. Tank'òra, nyon n'a trovâ dè fochílo lyètâ ou jànro *Dahutus*, chèn ke fâ a chè moujâ ke l'a èvoluâ ly a pou tèn du 'nna populachón ijolâye dè Kaprinnâ.

Kemèn *Dahutus* tîre prá du væ on tsâmo ou on botyètèn – fro la grantyá di tâpye è la fôrma di kouârne – chèn fâ akräere dè mîmo. JACQUAT chîte mimamèn di ka d'èntèrfèkonditâ ke cheràn-j-ou konyú èntre *Dahutus alpinus* è le tsâmo. Adòn hhou dûve chouârte dè bîh'e konchtituèràn ounna cholèta è mîma l'èchpéche ke cha morfologí l'è fro delé varúva. Du-j-òra, no fudräe pi konchidèrà le dahhú ènkornâ kemèn ònna chou-l'èchpéche dè tsâmo, èpúh'e adòn le rè nonmâ *Rupicapra rupicapra dahutiformis*.

No-j-an d'ará, po dre, dou linyâdzo totafé indèpendèn dè mamiféro (le “dahhú motú” è le “dahhú ènkornâ”) ke l'an-j-ou dèvelopâ di tâpye gôtse è dräete dè grantyá pâ paräere po ch'adaptâ i kontrèyòndze topografíke dè lou ènverounnamèn.

D'assiuvent des filmes et des fôtôs pible-yâs dessus des sitos du ouébo, s'abalye d'una sôrta èspèciâla de Caprinâ (la sot-famelye des chiévres, moutons et châmos). Doux livres de vulgarisacion et més d'un tèmognajô du jorn d'ora vant dens la méma dirèccion. Ètonament, la difèrence de grantior des tôples enchiéz le genro Dahutus l'est pariére a cen que sè vêt dens les fôrmes rècentes de Darrutus, cen que reprèsentè un cäs ègzemplèro de convèrgence èvolutiva.

A dère veré, celos groupos de mamifèros sont pas dirèctament aparentâs, tot-parièr lor anatomie l'at jouyé de la méma façon dens un enveronement montagnârd prod pariér. L'est gayârd le mémo l'aféro avouéc les uséls et les rata-lôves que l'ant dèvelopâ des âles èndèpendament. Tant qu'ora, nion n'at trovâ de fossilos gllètâs u genro Dahutus, cen que fât a sè musar que l'at èvoluâ l'y at pou temps dès na populacion isolâye de Caprinâs.

Coment Dahutus tere prod dès vèrs un châmos ou un boquetin (fôr la grantior de tôples et la fôrma des côrnes) cen fât acrère de mémo. JACQUAT cite mémament des cäs d'èntèrfèkonditâ que serant yu cognus entre Dahutus alpinus et le châmos. Adonc celos doves sôrtes de bétye constituèrant una solèta et méma l'èspèce que sa morfologie l'est fôr-delé varuva. Dès ora, nos fôdrèt pués considèrar le dahut encornâ coment une sot-l'èspèce de châmo, et pués adonc le renomâ Rupicapra rupicapra dahutiformis.

Nos ens d'ará, por dère, doux legnâjos tot-afét èndèpendents de mamifèros (le “dahut motu” et le “dahu encornâ”) que l'ant yu dèvelopâ des tôples gôches et drètes de grantior pas parières por s'adaptar ux contreyonges topografiques de lor enveronement.

L'è chòche ke l'a prou chûre bayí oúnna chouârta dè totú-boh'ú dèn lè tèmonyâdzo oró a propoué dè l'ègjichtèn'h'e "dou" dahhú.

Du-j-òra èn-n-àn, i djèndràë prou dè dèvejâ "di" dahhú. È chutò d'ourâ d'atàn mé lè-j-yè outre lè chayäete chu lè vèchère, po no-j-achurâ tyènta di dûve chouârte dè bîh'e i tâpye difèrènte no-j-an dèvàn lè-j-yè.

L'est ço-ce que l'a por sûr balyê une sôrta de tohu-bohu dens les tèmognâjos orâls a propôs de l'ègzistence "du" dahut.

Dès ora en-an, il gendrèt prod de devesar "des" dahus. Et surtot d'uvrar d'atant més les uelys outre les salyètes sur les vèrsêres, por nos assurar quinta des doves sôrtes de bétyes ux tôples difèrentes nos ens devant les uelys.

RÈMÀRHYÈMÈN

L'ôteú vou prâ rêmârhyâ dè bon ká M. Michel Sartori, dirèkteú du Mujé tyèntonó dè zoolojí, pæ Lojënna (Chuiche), po lè dokumèn, fró delé ènportèn, dè la bibyotèka dè kriptozoolojí dè chon mujé ke l'a bèn tan amâbyamèn betâ à dichpochòn.

REMARCIEMENTS

L'ôtor vôt prod remarciar de bon côr M. Michel Sartori, dirèctor du Musé cantonâl de zoologie, per Losena (Suisse), por les documents, fôr delé importants, de la bibliotèca de criptozologie de son musé que l'at ben tant amablement betâ a disposition.

BIBLIOGRAPHIE

- CHARTOIS Jo, CLAUDEL Calvin, 1945, Hunting the Dahut : a french folk custom, *The Journal of American Folklore*, 58/227 : 21-24
- GAND Georges, DEMATHIEU Georges, MONTENAT Christian, 2007, Les traces de pas d'amphibiens, de dinosaures et autres reptiles du Mésozoïque français : inventaire et interprétations, *Palaeoverte-brata*, 2007 (1-4) : 1-149
- JACQUAT Marcel S., 1995, *Le dahu : monographie ethno-éthro-biologique publiée à l'occasion de l'exposition inaugurée le 1^{er} avril 1995*, éd. de la Girafe Musée d'histoire naturelle, La Chaux-de-Fonds
- JACQUAT Marcel S., 2000, Petit précis de dahutologie, *L'Alpe*, 8 : 20-25
- JACQUAT Marcel S., 2012, Le Dahu (*Dahutus montanus*) : biologie, chasse, protection et communication + quelques autres animaux mythiques, *Nouvelles du Centre d'études francoprovençales*, 66/2012 : 44-50
- LEROY Patrick, 2000, 2002, *Le dahu*, vol. 1 & vol. 2, éd. du Mont, Annemasse
- MONTENAT C., 1968, Empreintes de pas de reptiles dans le Trias moyen du plateau de Daüs près d'Aubenas (Ardèche), *Bull. Scient. de Bourgogne*, 25 : 369-389
- UMBRES Radu, 2013, Chasse au dahu et vigilance épistémique, *Terrain*, 61 (septembre 2013) : 84-101